

Vuk'uzenzele

Ipapashwe liZiko lezoNxibelelwano nokuSasazwa koLwazi lukaRhulumente (GCIS) English/isiXhosa EyoMsintsi 2022 Ushicilelo 1

Ukutya kwesiZulu kubeke indawo yokutyela yaseKapa emephini



■ Ummabatho Molefe, ongumnikazi wendawo yokutyela i-Emazulwini eseKapa, uzuze udumo kwihlabathi ngokutya kwakhe kwesintu. Imifanekiso inikezelwe nguMolefe.

Owen Mngadi

Ngokubonakalisa ukuzingca ngelifa lakhe ngokutya kwesintu, umpheki uMmabatho Molefe ubeke ivenkile yakhe yokutyela, i-Emazulwini, kwimephu yehlabathi emva kokuba ibandakaniyiwe kuluhlu lwe-50 Next. Olu luhlu lunika amagama angama-50 abona bapheki abanikisa umdla kakhulu kwihlabathi, nabanakho ukuba ngenye imini babe kuluhlu oludumileyo

IweHlabathi lweeNdawo zoKutyela ezingama-50 eziGqwesileyo. UMolefe (27) usungule indawo yakhe yokutyela yale mihla yesiZulu eKapa e-V&A Waterfront's Makers Landing ngo-2020, emva kokuba ephulukene nomsebenzi wakhe ngenxa ye-COVID-19 kwishishini lokutyela. Uthi ukutya kwakhe kukhuthazwe kukukhulela kwakhe KwaZulu-Natal apho umakhulu wakhe wayebaphekela khona

ukutya kwesintu. Ukholelwa ukuba oku kumsebenzele kwaye kwamnceda ukuba agqame kakhulu kunabanye kolu khuphiswano lwe-50 Next. UMolefe uthi i-Emazulwini, itsale umdla kubemi boMzantsi Afrika kunye nakubatyelile bamazwe ngamazwe abanomdla wokuncamla ukutya kwakhe okukhuthazwe sisintu samaZulu. I-Makers Landing, liziko lokutya kunye nenkcubeko yase-Mzantsi Afrika, yeyona

ndawo ifanelekileyo kuye, uqhubeke watsho. I-Emazulwini inemenyu equlathe ukutya okusi-xhenxe, netshintshayo qho kutshintsha ixesha lonyaka. Ukutya kukaMolefe kuphakwa kakuhle kakhulu, kuquka ukutya okufana neSijingi – isidudu sethanga, ithanga eligcadiweyo, ijeli yepesika kunye ne-ayisikrimu yebhotolo emdaka; Isibindi nechakalaka – isibindi senkomo esifakwe ibhotolo, ilentile etyheli nechakalaka kunye nomhluzi wetswele; kunye neQanda, Isibindi noshatini – i-tartlet enetumata eyojiweyo, isibindi senkukhu kunye nekhrimu yeqanda enomqwayito. “Xa ufika eKapa, usenokungafumani mbonakalo yokwenyani yokuba uMzantsi Afrika ulilizwe elinjani, ngoko ke ndiye ndagqiba kwelokuba ndihlale ndinyanisekile kum ngokokutya kwesintu ndibonise abakhenkethi izinto esizityayo. Ndiye

ndizixelela qho kusasa ukuba ndibalisa ibali lam; kunye nendlela endikwazi ngayo ukutya kwesiZulu. Ndiyathemba ukuba abantu bakwamkela ngehlobo okululo. Sinethemba lokuphakamisa ukutya okuqhelekileyo sikwenze okugqwesileyo. IKapa linabemi abohlukeneyo, ngaphandle kwabakhenkethi bamazwe ngamazwe; bonke baye bafunde ngokutya kwesiZulu,” utshilo uMolefe.

Iindawo zokutyela ezingama-50 Eziphuma Phambili kwiHlabathi
Ibiyindlela kaMolefe yokwenza ukutya kwesintu kube kokwangoku nokuthe kwamnika indawo kuluhlu lwe-50 Next, noluthi qho ngonyaka lubhiyoze abantu abangama-50 abangaphantsi kweminyaka engama-35 nabathi babe nefuthe

Liqhubeka kwiphepha lesi-2



Youngsters unite against unemployment

Page 8



Don't miss an opportunity to study overseas

Page 13

Ukufunda uVuk'uzenzele khuphela i-GOVAPP kwi:

Khangela u- SA Government kwi Google playstore okanye kwi-appstore

QHAGAMSHELANA NATHI

Iwebhusayithi: www.gcis.gov.za I-imeyili: vukuzenzele@gcis.gov.za

www.vukuzenzele.gov.za Inombolo yomnxeba: (+27) 12 473 0103

Tshedimoseiso House:
1035 cnr Frances Baard and Festival streets, Hatfield, Pretoria, 0083

Vuk'uzenzele

@VukuzenzeleNews

Liqhubeka lisuka kwiphepha loku-1

kwezokutya kwihlabathi liphela. Olu khuphiswano lwenza ukuba aba bapheki baselula nabakrelekrele babonise ukupheka kwabo kwihlabathi.

UMolefe uzimase umsitho wamawonga kweyeSili-mela e-Bilbao, e-Spain, kwaye uthi ibilusuku olukhuthazayo nolunee-ngxoxo nabanye abathandi bokutya.

“Ndibe nethamsanqa lokufumana abantu abasuka kwilizwe lonke kunye nabaneminyaka eyahlukeneyo ubudala ukuba bazokonwabela ukutya kwethu. Abantu baqala ngolugweba ulusu

(amalungu angaphakathi esilwanyana atyiwayo) kwaye ndifuna ukubabonisa ukuba uyipheka kakuhle, inokunambitheka nje kamnandi njengayo nayiphi na enye inyama. Ndikwafuna ukukhuthaza ukutyiwa kwesilwanyana usukela empumleni uya kutsho emsileni, ukulwela indlela ezinzileyo yokutya,” utshilo uMolefe. Ekuqaleni kwalo nyaka, I-Emazulwini iphinde yaphumelela iwonga le-African Restaurant of the Year kuma-Luxe Restaurant Awards esine nabanjwa rhoqo ngonyaka.

ISicwangciso so-KwaKha ngo-kuTsha kunye

nokuVuselelwa koQoqosho

I-Emazulwini iqeshe abantu abane kwaye uMolefe unezicwangciso zokukhulisa ishishini lakhe. Uthi ubutyebi belifa loMzantsi Afrika ngoyena ndoqo wokutsala abakhenkethi kweli. Njengenxalenye yeSicwangciso soKwakha ngokuTsha kunye nokuVuselelwa koQoqosho, urhulumente uchonge icandelo lezokhenketho njengenye yemimandla ebalulekileyo yongenelelo kunye noyena mqhubi ungundoqo wokuvuselela uqoqosho.

ISEbe lezoKhenketho, icandelo labucala kunye nabanye abachaphazele-

kayo baye basebenzisana ukuphuhlisa iSicwangciso sokuVuselela iCandelo lezoKhenketho, esiza kunceda ukwenza intsebenziswano phakathi kukarhulumente kunye namashishini ukuqinisekisa ukuphuculwa indlela yokuphathwa kwabatyeleli. Oku kuya kwenziwa ngokwaziswa kwe-e-visas, ukukhuthaza ukhuseleko lwabakhenkethi kunye nokwenza lula ukuba abo bamkela

Ngeenkukacha ezithe vetshe malunga nendawo yokutyela i-Emazulwini tsalela umnxeba ku: **062 160 2347**

abakhenkethi bafumane iimpepha-mvume. **1**

Ubusazi na?

- Amashishini asa-
khasayo kwica-
ndelo lezokhenketho angafaka isicelo senkxaso-mali kwiSebe lezoKhenketho, neliyakuthi libabonisa iindlela zokuzithengisa kwaye libanike nezinye iindidi zenkxaso.
- Ngeenkukacha ezithe vetshe, tyelela ku: www.tourism.gov.za/Pages/home.aspx

Gcina imali: Thenga iimpahla ezingafakelwa rhafu



Allison Cooper

Ngelixa ukunyuka kweendleko zokuhlala kuthwaxa abemi boMzantsi Afrika, ingakumbi abo basuka kumakhaya arhola imivuzo ephantsi, ungaqinisekisa ukuba imali yakho ikunika lukhulu ngokuthi xa uthenga ukutya uthenge izinto ezingafakelwanga rhafu.

Iimpahla ezingafakelwa rhafu kukutya okuthile okusisiseko ekunganyanzelekanga ukuba abantu bahlawule irhafu kuko, nto

leyo ethetha ukuba okokutya kuthengiswa nge-xabiso eliphantsi. Abantu abathenga ukutya okuluhlu lweempahla ezingafakelwa rhafu banokufumana ngakumbi ngemali yabo, nto leyo ebanceda ukuba babeke ukutya okunesondlo etafilini.

NgokweNkcukacha-manani yoMzantsi Afrika (i-Stats SA), ukutya kunye neziselo ezingenabutywala (i-NAB) zibiza i-8.6% ngaphezulu kulo nyaka kweyeSilimela kunokuba bekunjalo kweye-Silimela ngowama-2021.

I-Stats SA ithe iimveliso

zokutya ezonyuke kakhulu sisonka, iinkozo ezitywayo (ezibandakanya umgubo wombona), inyama kunye namafutha - konke oku kukutya okusisiseko kwimizi emininzi.

Isonka kunye neemveliso zeenozo ezitywayo zinyuke nge-11.2% ukususela ngeyeSilimela kowama-2021, zisuka kwi-8.4% kuCanzibe walo nyaka, xa iSalathiso seXabiso loMthengi (i-CPI) sinyuke nge-1.1%. Unyuko lwenyanga lube yi-2.6%, amaxabiso onyuke ngokuqaphelekayo ngomgubo wombona (5.2%), isonka esimdaka (3.2%) kunye ne-makharoni (3%). Ukongeza koku, amaxabiso enyama anyuke nge-9.5% ukusuka kweyeSilimela kowama-2021 ukuya kweye-Silimela wama-2022, kwaye axabisa ngaphezulu kancinci kunokuba ebezile kuCanzibe wama-2022. Amafutha anyuka ngo-nyaka kangangama-32.5%, xa kuthlekiswa nama-26.9% kuCanzibe xa kunyuke i-CPI. Iindleko eziphezulu zama-futha, ngo-

kukodwa, zibeka uxinzelelo olongezelelweyo kuhlahlo lwabiwo-mali.

Yonga ngeempahla ezingafakelwa rhafu

Iimpahla ezingafakelwa rhafu zaphakanyiswa ngurhulumente ngonyaka wama-1991 ukunceda amakhaya anemivuzo ephantsi. Ukususela ekuphakanyisweni kwayo okokuqala, izinto ezininzi ziye zongezwa kolu luhlu.

NgokweZiko lezeRhafu eMzantsi Afrika, ukutya okungafakelwa rhafu kurhafiswa kangange-0% – oku kuthetha ukuba abantu bahlawula ngaphantsi kangange-15% kwezi mpahla kuba akunyanzelekanga ukuba bahlawule i-VAT.

Oku kutya kuquka:

- Isonka esimdaka
- Umbona owomileyo kunye nerayisi yombona
- Umgubo wesonka esimdaka (ngaphandle kwamakhatshu engqolowa)
- Umgqusho
- Amaqanda
- Imifuno kunye nezi-

qhamo ezintsha

- Iimbotti ezomileyo
- Iilentile
- Umgubo wombona
- Irayisi
- Intlanzi esezitotini
- Amafutha okupheka (ngaphandle kwama-futha e-olive)
- Ubisi, ubisi olukhulisiwayo, umgubo wobisi kunye nomxube wobisi
- Umdumba otyiwayo kunye neenozo ezitywayo ezikhula ngeengxam, ezifana nee-ertyisi, iimbotti, amandongomane, njl. Ii-sanitary towels (ii-pads) nazo azifake-lwanga rhafu, njengoko kunjalo nakwii-pads zokubeleka kunye nakwii-panty liners. Abantu abadala kufuneka kwakhona babuze kwiivenkile zabo zasekuhlaleni ukuba ngaba bayabanika na abantu abadla umhlala-phantsi isaphulelo, ngeentsuku ezithile, kwizinto ezifakwe irhafu. **1**



government
communications

Department:
Government Communication and Information System
REPUBLIC OF SOUTH AFRICA

Tel: 012 473 0353

Email: vukuzenzele@gcis.gov.za

Address: Private Bag X745, Pretoria, 0001

Head of Editorial and
Production
Regomoditswe Mavimbela
Regomoditswe@gcis.gov.za

Acting Editor-in-Chief
Zanele Mngadi | Zanelemngadi@gcis.gov.za

Acting Managing Editor
Tendai Gonesse | tendai@gcis.gov.za

News Editor
Noluthando Motswai

Writers: More Matshediso
Ursula Graaff

Graphic Designers
Tendai Gonesse | Benny Kubjana

Production Assistants
Jauhara Khan | Sebastian Palmer

Language Practitioners
Nomgcibelo Motha | Boitumelo Phalatse
Thandolunye Khulu | Mahanyele Ramapala

All rights reserved. Reproduction of the newspaper in whole or in part without written permission is strictly prohibited.

Vuk'uzenzele
is published by Government
Communications (GCIS)



Printed by:



Distributed by:





Xhasa amapolisa ukwenza uMzantsi Afrika ukhuseleke

Kuyakhula uku-phoxeka kunye nomsindo woluntu ngamanqanaba olwaphulo-mthetho kwilizwe lethu.

Uphango lwakutsha nje kunye nokudlwengulwa kwabasetyhini abasebatsha abasibhozo yimigulukudu e-Krugerdsorp kubangele isanxwe kwilizwe lonke, kwaye kukhokelele ekubeni kufunwe amanyathelo angqongqo ngakumaqela axhobileyo yabo bomba imigodi ngokungekho semthethweni nesebenza kulo mmandla.

INkonzo yesiPolisa yaseMzantsi Afrika ifanele kukunconywa ngezenzo zayo ezigqibeleleyo kwezi veki zintathu zidlulileyo, zokuphendula kudlwengulo kunye nakulwaphulo-mthetho olwenziwe yilemigulukudu kulo mmandla. Nangona kunjalo, uluntu luye lachaza ukuba akumelanga kuthathe ulwaphulo-mthetho oluphezulu ukuze kube kanti kukhona kuthathwa amanyathelo ngakulwaphulo-mthetho. Inyaniso yeyokuba kukho imingeni enzima ejongene nomsebenzi wesipolisa eMzantsi Afrika. Nangona kunjalo, sisebenza nzima ukuze siyoyise.

Njengawo onke amasebe karhulumente, iNkonzo yesiPolisa yaseMzantsi Afrika iyaliva ifuthe lengxaki yezemali yelizwe, yeminyaka emininzi kungaqeshwa basebenzi kunye nelokubanjwa ngobhongwane kukarhulumente. Amalungu amapolisa asebenza kwiindawo eziyingozi apho kufuneka ejongane nobundlobongela, ukwenzakala okanye ukufa.

Ulwaphulo-mthetho eMzantsi Afrika alusoze luphele ngaphandle ko-

mbutho wamapolisa oliqilima, okwaziyo ukwenza umsebenzi kwaye oqeqeshileyo. Izikhewu ezikhoyo e-SAPS ngomnye wemiba ephawulwe kwingxelo yeGqiza leeNgcali kwiZixholoxholo ezenzeke kweyeKhala ngowama-2021, nesithatha amanyathelo ukulungisa oko.

Emva kokubuyisela uzinzo obelufuneka kakhulu kwinkokeli ze-SAPS, ngoku sigxile ekuvaleni izikhewu ezithe zakhokelele ekubeni abasemagunyeni bogcinomthetho bafunyanwe bengakulungelanga ukujongana neziganeko ezenzeke kweyeKhala kunyaka odlulileyo.

Ukungaqeshwa kwabasebenzi kunye nokungabikho koqeqesho olwaneleyo kube nefuthe elibi ngokukodwa kuluntu kunye nakuCwangco loLuntu.

Urhulumente ubeke imali ukuze kuqeshwe amapolisa amatsha angama-12 000, kwaye iqela lokuqala kungoku lifumana uqeqesho olusisiseko. ICandelo loCwangco loLuntu le-SAPS liza kufumana amanye amalungu angama-4 000 kulo nyaka-mali, kwaye amalungiselelo oqeqesho olufanelekileyo la lamalungu luyenziwa.

Ngokufunda kwizixholoxholo ezenzeke ngeyeKhala kunyaka odlulileyo, sisebenzela ukuphucula intsebenziswano phakathi kwee-arhente zogcinomthetho kunye neshishini labucala lokhuseleko ekulweni ulwaphulo-mthetho. Sifuna intsebenziswano engqongqo nabo bonke abachaphazelekayo, kuqukwa nabezoshishino, ukuze kwabelwane ngezixhobo kunye nobuntlola bolwaphulo-mthetho ukuze kuphuculwe ukhuseleko loluntu kwaye

kujongwane nolwaphulo-mthetho oluphazamisa imisebenzi yezoqoqosho.

Umzekelo, kukho intsebenziswano phakathi kwe-Transnet Freight Rail kunye ne-SAPS yokulwa nobusela beziseko ezingundoqo kunye nokonakaliswa kwentambo zogesi. Olu lwaphulo-mthetho luchaphazela kakhulu uqoqosho njengoko iinkampani zingasakwazi ukuhambisa iimveliso zazo kumazibuko eli ukuze zithunyelwe kumazwe angaphandle. Omnye umzekelo wentsebenziswano uphakathi kokhuseleko lomgodi, ukhuseleko lwabucala kunye ne-SAPS ukulwa ubusela beentsimbi ezixabisekileyo.

Ngenxa yezi nzame zidityanisiweyo, sibona inkqubela-phambili kwimimandla efana neMpumalanga kunye neLimpopo eziye zazindawo ezibonakalisa ukungazinzi njengoko iintsimbi ezibiweyo bezisuswa zisiwe kwiimarike ezingekho mthethweni phesheya.

Ngokusebenzisa amacandelo ayo esizwe okungenelela, i-SAPS nayo iqhubela phambili ekulweni ulwaphulo-mthetho olucwangcisiweyo, kubandakanywa amaqela eziyobisi, amaqela emigulukudu kunye nokwembiwa kwemigodi ngokungekho semthethweni.

I-SAPS iseka igqiza elijongene nokwembiwa kwemigodi ngokungekho semthethweni, kunye namanye amaqela asebenzayo ajongene nokuxhwilwa kweendawo zokuhlala, ukubiwa kobhedu kunye neentambo zogesi, ubusela kunye nokonakaliswa kweziseko ezingundoqo zoqoqosho. Singayilibelanga impumelelo yomsebenzi wamapolisa ekujongeni ulwaphulo-mthetho kwezoqoqosho, ukusebenza nzima kwe-SAPS ekujongeni

ulwaphulo-mthetho gabalala amaxesha amaninzi akujongelwa ntweni.

Kulo nyaka-mali upheliweyo, umzekelo, Icandelo loPhando loLwaphulo-mthetho lwe-SAPS lizuze izigwebo zobomi ezingama-206 kubatyholwa abangama-209, abali-154 kubo ibingawokubulala kunye nawokudlwengula. ICandelo le-SAPS elijongene nobuNdlolobongela boSapho, uKhuseleko lwaBantwana kunye naMatyala oLwaphulo-mthetho ngokweSondo lizuze izigwebo zobomi ezingama-356 kubatyholwa abangama-266. Amaphulo okulandela umrhanelwa abangele ukubanjwa kwabantu abangaphezu kwe-13 000.

Ngenxa yezinga eliphezulu lolwaphulo-mthetho kuluntu lwethu, kucacile ukuba kuninzi ekusafuneka kwenziwe. Kodwa la manani abonisa ukuba uninzi lwezaphuli-mthetho luyabanjwa kwaye lutshutshiswe ngempumelelo. Abavunyelwa ukuba bophula umthetho nje gqiba kungabikho ziphumo. ICandelo loPhando loLwaphulo-mthetho oluBalulekileyo, elaziwa ngokuba ngooKhetshe, liphumeze konke ebelijolise kulo nyaka-mali uphelileyo, okubangele ukuba kubanjwa, kugwetywe, kuhluthwe impahla, kufunyanwe izithintelo kunye neziyalelo zokuthinjwa kunye nemiyalelo yokuhluthwa kwezinto okuxabisa izigidi zeerandi. Ukubanjwa kunye nezigwebo ezifunyaniswe ngooKhetshe zibandakanya ukombiwa kwemigodi ngokungekho semthethweni, ukonakaliswa kwemibhobho yepetroli, ukuphangwa kwemali kunye nokubulawa kwamapolisa.

OoKhetshe baqalise ukusebenza neCandelo loPhando le-NPA kumatyala aphuma kwikomishini yokubanjwa

ngobhongwane kukarhulumente.

I-SAPS ibisoloko ixhasa umlo ojongene nobundlobongela obusekelwe kwisini, iseke amagumbi alungele amaxhoba kwizikhululo zamapolisa kwaye yathenga malunga nesiqingatha sesigidi sezixhobo zokuqokelela ubungqina ukuze zisasazwe kwizikhululo.

Umsebenzi wamapolisa awunakuphumelela ngaphandle kwentsebenziswano yoluntu. Ngesi sizathu, sigxile ekwandiseni uthungelwano lweeForam zamaPolisa zasekuHlalenini ukuze kuphuculwe ubupolisa kunye nobudlelwane noluntu.

Siyaluncoma uluntu oluthatha uxanduva lokugcina imimandla yalo ikhuselekile ngokujikeleza ezitalatweni, amaphulo okwazisa ngolwaphulo-mthetho kunye neminye imisebenzi.

Sisebenzisa ingxelo yeGqiza leeNgcali njengesiseko sohlaziyo lwesebe, silungiselela ngokutsha, sibeka izixhobo kwimisebenzi ephambili, siphucule futhi someleza amandla onyanzeliso lomthetho kwiinkalo zonke.

Ukuba lipolisa okanye ipolisakazi kwilizwe lethu ngowona msebenzi unzima, unoxinzelelo kunye nobungozi, kwaye amaxesha amaninzi ababulelwa. Ngeli lixa ukuphoxeka koluntu lulwaphulo-mthetho kuqondakala, kulilishwa ukuba oku kumele kubangele ubutshaba ngakumapolisa ethu, naqhubeka esebenza kwaye ekhusela.

Njengoko urhulumente esebenzela ukunika amapolisa izixhobo eziyimfuneko, uqeqesho kunye nemali ukwenza umsebenzi yawo, ndihlaba ikhwelo kubo bonke abemi boMzantsi Afrika ukuba bazibandakanye kwiinzame zokugcina izitalato zethu kunye nasekuhlaleni kungekho lwaphulo-mthetho.

Masiwuthathele ingqalelo umsebenzi onzima oweenziwa ngamapolisa ethu kwaye siwanike inkxaso yethu epheleleyo ekwenzeni uMzantsi Afrika ube yindawo ekhuselekileyo. **U**